



CONCELLO DE BUEU

ALCALDÍA

Rúa de Eduardo Vincenti, 8. 36930 - Bueu (Pontevedra)

TLF. 986 390 029 / FAX 986 322 099

CIF: P3600400J. Rex. E.111

DECLARACIÓN INSTITUCIONAL PARA O 25 N, DÍA INTERNACIONAL CONTRA A VIOLENCIA MACHISTA

Cada 25 de novembro os titulares, os minutos de silencio e as declaracións institucionais lembran a vixencia da violencia machista e do sistema patriarcal. Esta violencia ten o seu extremo nos asasinatos de mulleres que ano a ano se producen. Así, no que levamos de 2019, 51 mulleres foron asasinadas polas súas parellas e exparellas no considerado ámbito íntimo oficial, aos que habería que sumar os feminicidios íntimos non oficiais, os feminicidios non íntimos, os feminicidios infantís, os feminicidios familiares, ou os feminicidios por prostitución, entre outros. Indo máis alá, desde o ano 2010, cando se empezan a documentar os crimes machistas en España, rexistráronse 1.076 mulleres asasinadas por homes.

Porque, a violencia contra as mulleres ten moitas caras e perpetúase no mantemento dun sistema patriarcal que desde certas ideoloxías se busca perpetuar. E ante esta ameaza contra os dereitos das mulleres, non podemos dar ningún paso atrás, e temos que reclamar medidas para que o Estado español avance nunha definición da violencia machista que supere o enfoque patriarcal e reduccionista que limita ao ámbito familiar e da parella, tal e como se recolle no Convenio de Istambul e no Pacto de Estado Contra a Violencia de Xénero. No caso concreto de Galiza, aínda que contamos cun marco legal que inclúe a violencia sexual como unha forma de violencia machista desde o ano 2007, o certo é que tampouco se realiza o esforzo suficiente por parte da administración autonómica para adaptar os recursos a todo tipo de violencia exercida contra as mulleres.

A violencia machista exercida contra as mulleres é un problema de primeira orde, contrario aos dereitos humanos e que a escala mundial representa un auténtico xenocidio.

Por este motivo, os voceiros dos grupos políticos da corporación municipal de Bueu, **ACORDAMOS:**

1. Demandar á Xunta de Galiza o incremento dos recursos económicos destinados especificamente a loitar contra a violencia de xénero do proxecto de orzamentos de 2020, de forma que se sitúen como mínimo, no 1% do total e así dotar de suficientes recursos para que se rectifique a liña de incumprimento da Lei 11/2007, do 27 de xullo, galega para a prevención e o tratamento integral da violencia de xénero. Así como tamén, a mellora da atención e prevención da violencia machista e, particularmente, da violencia sexual, adoptando as seguintes medidas:



- a) Garantir a gratuidade da atención xurídica ás vítimas de violencia sexual por ser vítimas de violencia machista e impulsar unha campaña específica para informar da existencia deste recurso.
- b) Promover un programa específico de formación en materia de violencia sexual para todos os ámbitos profesionais que traballan na prevención e atención da violencia machista (ámbitos sanitarios, policiais, administrativos e xurídicos, educativos, administración local...).
- c) Constituír unha mesa de traballo na que se avalíe, xunto cunha representación do ámbito xudicial, policial e forense, a casuística das denuncias en Galiza por agresión sexual, de cara a analizar posíbeis fallos na cadea de atendimento e intervir no seu baixo número.
- d) Desenvolver un protocolo específico de atención á violencia sexual, con especial atención ao ámbito xudicial.
- e) Impulsar iniciativas no campo da prevención e sensibilización da mocidade, a comezar pola extensión, antes do remate de 2020, a todos os centros de educación secundaria do país de obradoiros específicos sobre o consentimento co obxectivo de contribuír a superar a preeminencia da pornografía como referente formativo na mocidade galega; así como desenvolver as actuacións necesarias para incorporar contidos educativos transversais de superación da dominación sexual en todas as fases educativas.
- f) Aumentar os recursos económicos e de persoal para garantir que os Centros de Información ás Mulleres (CIM), para que desde estes servizos se poidan garantir a información o máis detallada e personalizada posible ás mulleres que acoden ao servizo tras sufrir agresións. Así mesmo, é necesario que as mulleres reciban axudas económicas de maior cantidade e durante máis tempo.

2. Demandar do goberno central as seguintes medidas para avanzar no recoñecemento da violencia sexual como violencia machista:

- a) Demandar a introdución no marco legal do concepto de consentimento para mellorar a tipificación e tratamento da violación e das agresións sexuais así como a consideración destes delitos como delitos de carácter público.
- b) Impulsar a aplicación da directriz do artigo 36 do Convenio de Istambul que estipula que as autoridades deben adoptar todas as medidas necesarias para garantir que o sexo non consentido sexa tratado sempre coma un delito.
- c) Modificar a definición estatal de violencia de xénero de acordo co Convenio de Istambul de forma que a violencia sexual sexa recoñecida como tal, como xa fixo a lei galega no ano 2007.



CONCELLO DE BUEU

ALCALDÍA

Rúa de Eduardo Vincenti, 8. 36930 - Bueu (Pontevedra)

TLF. 986 390 029 / FAX 986 322 099

CIF: P3600400J. Rex. E.111

d) Desenvolver as actuacións legais de organización necesarias para que os delitos de violencia sexual sexan instruídos nos xulgados exclusivos de violencia machista e transferir a Galiza os recursos orzamentarios necesarios para esta adaptación.